



Inatsisartunut ilaasortaq Naaja Nathanielsen, Inuit Ataqatigiit
/-Maani

§ 37 naapertorlugu apeqqut nr 007-2015-imut akissuteqaat

Inatsisartut suleriaasianni § 37 naapertorlugu Naalakkersuisunut imaattunik apeqquteqarputit. Apeqqutit uannut akisassanngorlugit innersuunneqarsimapput. Apeqqutit 1, 2 aamma 3 eqqarsaatigalugit Pinngortitamut, Avatangiisinut Inatsisinillu Atuutsitsinermut Naalakkersuisoq akissuteqaatinut ilassutissanik pissarsivigisimavara.

27. januar 2015
Suliap nr. 2015-110064
All. Nr. 1838070

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apnn@nanoq.gl
www.nanoq.gl

Naalakkersuisunut apeqquteqaatit:

1. Nunatsinni sumiiffinni assigiinngitsuni aqutigeqqusaasut avataanni motorilinnillu angallavigeqqusaanngitsuni ATV-nik ingerlateqarluni angalasoqartarnera Naalakkersuisunit ilisimaneqarpa?

Akissut 1)

Pinngortitamut, Avatangiisinut Inatsisinillu Atuutsitsinermut Naalakkersuisoq:
“Assartuutinik motorilinnik atuineq pillugu Namminersorlutik Oqartussat nalunaarutaat nr. 10, 10. oktober 2013-imeersoq naapertorlugu nunaannakkut motorilinnik angallaneq malittarisassaliuunneqarsimavoq.

Nalunaarummi aallaavusoq tassaavoq angallassissutinik motorilinnik nunaannakkoortoqarnissaa inerteqqutaasoq.

Nalunaarut kommunenit aqunneqarpoq, taakkulu nunaannakkut ingerlaartoqarsinnaanera akuersissutigisinnaavaat mianerisassat arlallit isiginiarlugit.

Nalunaarut naapertorlugu kommunalbestyrelsit nalunaarummi malittarisassat malinneqarnissaat nakkutigisussaavaat. Periaaseq nalinginnaasoq naapertorlugu inuinnaat unioqqutitsisoqarneranik takunnittut politiinut nalunaarutiginnittarput, matumani ilaatigut nunaannakkut unioqqutitsilluni motorilinnik ingerlaarneq ilaalluni. Politiiinut suliassanngortinneqarsimasuni unnerluussisussaataasunit Politimestereqarfiup tusarniaanerinut atatillugu nalunaarummik unnioqqutitsisoqartartoq Naalakkersuisut ilisimavaat. Angalaffissatut akuerisat avataanni unioqqutitsilluni ingerlaartoqarsimaneranik 2014-imi Naalakkersuisut ataatsimik ilisimasaqarput.”

Piniarnermik nakkutilliisut Aalisarnermut, Piniarnermut Nunalerinermullu Naalakkersuisoqarfimmi sulisut nammineeerlutik takusimavaat nunaannarmi ATV-t aqutigisimasaat, aasakkut/ukiakkut unioqqutitsilluni ingerlaartoqarneranit pisimasorineqartut. ATV-nik unioqqutitsilluni atuineq innuttaasunit aamma nalunaarutigineqartarsimapput. APNN-ip 2014-imi suliat ikinnerpaamik pingasut Politiiinut nalunaarutigisimavaat.

2. Nittartakkami hunting-greenland.com-imi allaaserisat assilisallu takuneqarsinnaasut aqputigeqqusaasut avataanni, motorilinnillu angallavigeqqusaanngitsuni ATV-nik ingerlateqarluni angalasoqartarneranik takutitsisutut isikkoqarnerat Naalakkersuisut isumaqatigaat?

Akissut 2)

Pinngortitamut, Avatangiisinut Inatsisinillu Atuutsitsinermit Naalakkersuisoq:
"Nittartakkami imaaliallaannaq takuneqarsinnaanngilaq nunaannakkut angallassissutinik motorilinnik ingerlavissat taaneqartut avataatigut ATV-nik angallannissamut neqerooruteqartoqarnera.

Assinik takutitsivimmi innersuussanni asseqarpoq Kalaallit Nunaanni nunaannakkut ATV-nik angalaartoqartarneranik takussutaasinnaasumik.

Sumi qangaluunniit assilisaasimanersut allaqqanngilaq, assillu aallaavigalugit aalajangerneqarsinnaanngilaq angallatit motorillit atorlugit nunaannakkut angallavissat avataatigut ATV-nik atuisoqarsimanersoq."

3. Ilumoorpa Kangerlussuarmi Inatsisinik Nalunaarutinillu unioqqutitsinikkut pinngortitamik ajoquseerujussuortoqartarneranik Naalakkersuisut arlaleriarujussuarlutik nalunaarfigineqartarsimasut? Taamaattoqarsimappat: Tamatumunnga atatillugu Namminersorlutik Oqartussat qanoq iliuuseqarsimappat?

Akissut 3)

Aap, arlaleriarluni. Taamaattorli pisut itisiliisumik nassuiaasersorluagaanngillat, assitaqartinnagulu imaluunniit allanik paasissutissanik ilaqartinnagu politiinut nalunaarutiginissaat naleqquttuusimanngilaq. Saaffiginnissutit amerlasuut tunngavigalugit piniarnermik aalisarnermillu nakkutilliisut Kangerlussuarmi piniarneq immikkut pingaartissimavaat. Inuussutissarsiuutigalugu tammajuitussarsiniutigalugu piniarnermut nakkutilliinermut atatillugu piniarnermik aalisarnermillu nakkutilliisut unioqqutitsilluni ATV-nik atuneq naammattoortarsimavaat. Taakku pisimasut Politiinut nalunaarutigineqarput, tak.1-mut akissut.

Pinngortitamut, Avatangiisinut Inatsisinillu Atuutsitsinermit Naalakkersuisoq:
"Kangerlussuup eqqaani angallassissutinik motorilinnik akuerisaanngitsunik atuisoqartarnera Namminersorlutik Oqartussat ilisimalersimavaat. Malittarisassanik ersarissunik pilersitsiniarmi tamaani angallassissutinik motorilinnik atuinermut tunngasumik Namminersorlutik Oqartussat 2010-mi "Kangerlussuup eqqaata aqutsivigineqarnissaanut pilersaarusiaq ¹" suliaarat kommuni tamaanilu soqutigisallit suleqatigalugit. Aqutsinissamut pilersaarummi qitiutinneqartut ilagaat angallassissutit motorillit nunap immikkoortuini sorlorni atorneqarsinnaanerat. Tamaani angallannerup siunertamut naapertuuttumik inatsisiliuunnissaanut Namminersorlutik Oqartussat angallassissutinik motorilinnut tunngasumik nutaamik nalunaarusiorlutik tamanna qulakkeersinnaagaat taamani saqqummiunneqarpoq, tassani nunaannakkut angallannermut kommunit namminneq kommuneqarfimminni atuuttussanik

¹ Aqutsinissamut pilersaarusiaq Naalakkersuisut nittartagaanni uani takuneqarsinnaavoq:
http://naalakkersuisut.gl/da/Naalakkersuisut/Departementer/Natur-Miljoe-og-Justitsomraadet/Natur_-Energi-og-Klimaafdelingen/Natur/Forvaltningsplan-for-Kangerlussuaq.

malittarisassiorsinnaallutik. Angallassissutit motorillit ator neqartarnerat pillugu nalunaarut taanna 1. januar 2014-imi atuutilerpoq.

Aqutsinissamut pilersaarutip juni 2010-imi atuutiler nerata kingorna nunatap ator neqarnera pillugu ineriartornerup malinnaavigineqarnissaa pillugu Kangerlussuarmi nalilersuilluni pingasoriarluni ataatsimiittoqareerpoq, matumanilu angallassissutinik motorilinnik atuineq ilanngullugu eqqarsaatigalugu. Nalilersuinerit tunngaviumik takutissimavaat nunatap ator neqarneranut tunngasunik siornatigut unammillernartut aqqiivigineqarsimasut. Taamaattoq aqqutigeqqusaasut avataanni akuerisaanngitsumik angalasoqartarnera pillugu ukiumut ataasiakkaanik naammangittaalliutigin eqqarsimavoq. Namminersorlutik Oqartussat naammangittaalliutinut taakkununnga atatillugu innuttaasut unioqqutitsinernik ilisimasaqalersimappata tamakku politiinut nalunaarutigeqqullugit kaammattortarsimavaat.”

4. Aqqissusseqqinniarnermi ”sumiiffiit immikkut nakkutigineqartussatut isigineqartussat” suut tunngavigalugit taamatut isigineqartussatut toqqarneqarniarpat?

Akissut 4)

Sumiiffiit aarlerinaatillit toqqarneqarnerat, paasissutissanik katersanik misissueqqissaarnernit, takunnittarnernit kiisalu paasissutissanik pioreersunik tunngaveqarput. Tamanna tunuliaqutaralugu paasissutissat katersat unioqqutitsinernillu takunnissimanagerit sumiiffinnik aarlerinaatilinnik toqqaaniarnermi toqqammaviulluarsimapput. Sumiiffinnik unioqqutitsisoqarnissaanik ilimanaateqarnerpaanik nakkutilliinerup atuutiler neqarnera ingerlaavartumik ineriartortuuvoq, tassani uuttuutit arlallit nutaallu ilanngunneqartarlutik.

Erseqqissassallugu pingaaruteqarpoq sumiiffinni allani nakkutillineq tunngaviumik ingerlaavartuummat unioqqutitsisoqarnissaanik ilimanaateqarfiusutut toqqakkani nakkutilliinerup nukittorsarnerata saniatigut.

5. Inuit ataasiakkaat suliffeqarfiilluunniit piniarnermut, aalisarnermut pinngortitamiluunniit angalanermut malittarisassanik unioqqutitsisut sakkortunerusumik pineqaatissinneqartarnissaannik eqqarsaatersortoqarpa?

Akissut 5)

Malittarisassanik unioqqutitsinerit ilaanni piniakkanik aalisakkanillu pisanut tunngasuni Kalaallit Nunaannut Pinerluttulerinermut Inatsit naapertorlugu akiliisitsisoqarsinnaallunilu arsaarinnittoqarsinnaavoq.

Uumasut suussusii nalunaarummi aalajangersakkanik piaarluni utikattumilluunniit sakkortuumik unioqqutitsisarneq tunngavigalugu aamma periarfissaavoq piffissami killilimmi piniarnermut allagartaqarsinnaanerup arsaarinnissutaanera.

Piniarneq aallaaniarnerlu pillugit inatsisissamut nutarterneqartussamut atatillugu isumaliutigineqarpoq malittarisassat ima sukaterneqassasut, tassalu pisuni immikkut ilungersunartuni piniarnermut aamma aalisarnermut nakkutilliisooq imaluunniit Naalakkersuisooqarfik Politiit suliamik misissuineranni pineqartup

piniarnermut uppernarsaataata akuersissutaasalu allat arsaarinnissutigineqarallarnerat. Taama inatsisitigut tunngaveqarnissaq inatsisini atuuttuni amigaataavoq.

Periarfissat ilaat nalilersorneqartoq tassaavoq Piniarnermik aalisarnermillu nakkutilliisut pisuni ilungersunannginnerusuni akiligassiisinnaatitaalernissaat arsaarinnissinnaalernissaallu, taamaasilluni suliat immikkut ilungersunarnerit kisimik Politiit aqqutigalugit suliakkiissutigineqartarlutik. Taamatut pisinnaatitsilernissaq Danmarkimi politiinit oqartussanit akuerineqaqqaartariaqarpoq.

Akiliilluni piniarneq aalisarnerlu pillugit malittarisassiornermi nalunaarusiassaq Aalisarnermut, Piniarnermut Nunalerinermullu Naalackersuisoqarfiup nutarternialerpaa. Missingiummi nutaami piffissamilu qanittumi tusarniaassutigineqartussami pineqaatissiisinnaanernik sukateriffiussaaq, ilaatigut pisortaqarfiup akiliilluni piniariartitsisinnaanermut akuersissummik utertitsisinnaaneranik imaluunniit akiliilluni aallaaniarsinnaanermut aaqqissuussisartunut akuersissutinik tunniussisarnerup unitsinneqarneranik, akiliilluni aallaaniartitsinermi aaqqissuisoq, taassuma ilisimasortaa piasarinnittualuunniit akiliilluni piniarnermut nalunaarusiap saniatigut inatsimmik allamik unioqqutitsippata, unioqqutitsinerlu akiliilluni piniarnermut toqqaannartumik atassuteqarpat.

Tamanna ima isumaqarpoq, tassalu akiliisitsilluni piniariartitsisartup ATV-nik angallateqarluni ingerlavigeqqusaanngitsukkut ATV-nik atuilluni assersuutigalugu piniariartitsisimappat akiliisitsilluni piniariartitsisartup akuersissutini annaasinnaallugu. Inatsimmi nutarterinerit taakku tamanut tusarniutigeqqaarneqassapput, inatsisitigut tunngaviit misissoqqaarneqassallutik Naalackersuisunillu akuereqqaarneqassallutik.

6. Ukiarmi nunatta avannaani "pisassanik killilersuiffiunngitsumik" pilersitsisoqarpoq. Tassunga atatillugu §37 naapertorlugu pissutsit atuutilersut pillugit apeqquteqarpunga. Taamanikkut Aalisarnermut Naalackersuisuusoq apeqqutinnut siullermut akissuteqarami nalunaarutigaa Nunatsinni Aalisarnermik Nakkutilliisut annertunerusumik nakkutilliilissasut. Tamanna suli pilersaarutigineqarpa, aamma taamatut suliaqarnermut Naalackersuisunit aningaasaliissutit amerlineqarnissaannik pilersaaruteqartoqarpa?

Akissut 6)

Kalaallit Nunaanni Aalisarsinnaanermik Akuersissutinik Nakkutilliisoqarfiup pisassanik killilersuiffiunngitsuni aalisartunik nakkutilliinini annertusivaa, sulisut atugassaritinneqartut atorlugit. Sumiiffiit taakku suli immikkut nakkutigineqassapput, nakkutilliisinnaasunik atuinermi pingaarnersiuiinernut atatillugu.

Inussiarnersumik Inuulluaqquusillunga